

## **Informasjon om hjort- og elgjakta - Lærdal 2023**

I det følgjande har me oppsummert hovudpunkta knytt til hjort- og elgjakta i 2023. Informasjonen vert sendt ut på e-post saman med fellingsløyva, slik at det er lett for dei valdansvarlege å senda vidare til grunneigarar og jegerar.

Skrantesjuka og førebygging av smittespreiing er framleis hovudfokus i området vårt. Kommunane kring Nordfjella og Hardangervidda er bedne om å halda låge bestandstettleikar for å unngå at hjortevilt vert smitta eller at eventuell uoppdaga smitte får spreia seg.

Ny bestandsplan for hjort vart godkjend denne våren, og ligg til grunn for løyvetildeling og fellingsmål i perioden 2023-25. Hovudmålet er å ha ein solid og produktiv bestand i Lærdal, men at tal hjort er lågare enn i dag.

I punkta under er det lista opp viktig informasjon for jakta til hausten. Om det er spørsmål, er det berre å ta kontakt!

### **Kvote**

Gjeldande bestandsplan for hjort er for perioden 2023-2025. Det er i bestandsplanen bestemt ei kvote på 783 fellingsløyve for hjort i 2023. 106 løyve er til valda utan bestandsplan. Dei valda som er medlem i Lærdal bestandsplanområde har for 2023 ei kvote på 677 fellingsløyve. I tillegg kan valda med bestandsplan flytta inntil 20% av løyva (eller minimum 1 løyve) mellom åra i bestandsplanperioden. Medlemsvalda har også høve til å flytta fellingsløyve til eller frå andre vald som også er medlem i Lærdal bestandsplanområde. Slik flytting krev skriftleg avtale mellom valda. Ta kontakt med underteikna for slikt avtaleutkast.

Det er fri kvote på hjortekalv i Lærdal sesongen 2023/24. Dette gjelder alle grunneigarar i alle vald, uavhengig av om valdet er medlem eller ikkje.

For elg er det 66 fellingsløyve og for rådyr er det 1 fellingsløyve.

Sjå vedlegg for fordeling på dei ulike valda.

### **Jakttid**

Kommunane kring Nordfjella og Hardangervidda har utvida jakttid på elg og hjort i jaktåra 2022/23-2024/25. Den formelle jakttida er 15. august-31. januar. Det er freding frå jul til nyttår. Det er heller ikkje lov å nytta laus hund i periodane 15. aug.–31. aug. og 1. jan.–31. jan.

Jakttida for rådyr er delt:

- Vaksen rådyrbukk: 10. august-23. desember

- Anna rådyr: 25. september-23. desember.

### **CWD –prøvetaking**

Vaksen hjort og elg skal prøvetakast av jegerane. Prøveresultata er svært viktige for vegen vidare. Info og utlevering av prøvemateriell skjer på jegermøte i august og i kassa ved teknisk på Bergo/ved brannstasjonen.

All generell informasjon om CWD er samla på: <https://www.hjortevilt.no/>

### **Kjeveinnsamling**

Det er innsamling av kjevar frå hjort og elg i Lærdal kommune sesongen 2023/24. Alle kjevar frå ungdyr og vaksne skal reinskjærast, merkast med den store delen (utfylt!) av merkelappen og leverast inn. Me sender ut info om kor og når kjeven skal leverast.

### **Jegermøte**

Me planlegg å ha jegermøte i Lærdal før jaktstart i august. Meir info om stad og klokkeslett kjem seinare.

### **Helikopter**

Statens naturoppsyn tilbyr IKKJE helikoptertransport av slakt denne sesongen. Eventuell utflyging må organiserast privat.

### **Sal av slakt**

Når det skal fellast mykje hjort, kan det kanskje vera trong for å selja unna eit slakt eller to. Haugen gardsmat i Flåm v/Odd Ohnstad kjøper slakt. Sjå <https://www.haugengardsmat.no/jegerinfo>

Telefonnummeret til Odd er 915 39026.

### **Sett-og-skutt**

All jakting skal registrerast på Hjorteviltregisteret. Det er viktig også å registrera jaktdagane utan felling eller observerte dyr. Registreringane gjerast anten ved å logga deg inn på [www.hjorteviltregisteret.no](http://www.hjorteviltregisteret.no) eller ved å lasta ned settogskutt-appen. Det er viktig at jegerane registrerer jaktinga si fortløpande,

då har me betre oversikt over korleis fellinga ligg an underveg i jakta. Her er det ennå mykje å gå på i Lærdal! CWD-prøvene skal også registrerast her.

Prøvesvaret for CWD-prøvene finn de på hjorteviltregisteret under «Helse»-fana i Hjorteviltregisteret. I 2018 vart det gjort nokre endringar på korleis jegerane skulle registrera jaktinga si på settogskutt. I korte trekk var endringa den at alle observerte dyr skulle registrerast, uavhengig av om dyret med sikkerheit var sett fleire gonger/av andre. Me trur ikkje mange fekk med seg denne endringa, fordi det ikkje var godt marknadsført. I tida no er sett-hjort-registreringane viktigare enn nokon gong fordi me på den måten kan følgja med på endringane i bestanden opp i mot målet om reduksjon. Ei endring i måten å føra på er difor uheldig fordi det vert vanskelegare å samanlikna tala mellom åra. Difor har me beslutta at me **IKKJE VIL FØLGJA** endringa som det er lagt opp til i føring av sett-hjort. Alle jegerar i Lærdal skal altså føra sett-hjort som før, og ikkje ta hensyn til endra instruks! Ergo, registrer sett-hjort som «vanleg»!

## **Human jakt**

Sjølv om det er ønskjeleg med høgt fellingsresultat, er det viktig at de tenkjer sikkerheit og human jakt når de er ute. Skyt kalven før kolla. Hugs plikten til å ha tilgang på ettersøkshund –og bruk hunden når uhellet er ute! Her har me ein del å gå på!

## **Samarbeid**

Dei valda som er medlem i bestandsplanområdet har moglegheit til å flytta løyve mellom valda, og mellom åra i bestandsplanperioden. For å flytta løyve mellom åra i planperioden trengs det ingen avtale. Det er mogleg å nytta løyve frå 2024 i 2023, men berre inntil 20% av kvota kan flyttast mellom år (eller minimum 1 løyve). Alle fellingane skal meldast inn i fellingsrapporten det året dei er felt. For å flytta løyve mellom vald som er medlem i bestandplanområdet, må valda ha ei skriftleg avtale om samjakt. Ta kontakt om du ønskjer eit ferdig formular på dette. Det valdet som får fellingsløyvet tildelt, skal rapportera resultatet, uavhengig av om løyve er nytta på eit anna vald. På settogskutt registrerer jegerane fellinga på det valdet som dyret vart jakta på.

Fellingsavgifta vert fakturert valdet som fekk løyvet. Det som truleg vil vera begrensande for jaktuttaket til hausten er jegeranes tilgjengelege tid til å jakta. Dei valda som «føler seg ferdig» med å jakta i løpet av hausten og som har mykje dyr i terrenget, bør vurderer om dei kan slippa fleire jegerar inn i terrenget. Dette kan gjerast anten ved at jegerar har med «eigne fellingsløyve» eller at fleire jegerar kan koma inn og jakta på dei løyva som er gitt det aktuelle valdet. Dei merka hjortane fortel oss at dyra nyttar mange vald i løpet av året.

Dei dyra som ein kanskje opplever som «eigne dyr», flytter seg oftast mykje, både i løpet av døgeret og sesongen.

### **Fellingsavgift**

<b>Fellingsavgift:</b>	<b>2023</b>
Hjort $\geq$ 1,5 år	450
Hjort kalv	0
Elg $\geq$ 1,5 år	580
Elg kalv	0

### **Rapportering**

Frist for rapportering til kommunen er 14 dagar etter endt jakttid. Som i fjor, og truleg i all framtid, skal valdansvarleg gjera dette i hjorteviltregisteret. Me tek sikte på litt meir info om dette når det nærmar seg.

### **Skitt jakt!**